

北西極四



欽定古今圖書集成

方輿彙編  
山川典

欽定古今圖書集成方輿彙編山川典

第四十一卷目錄

恆山部彙考一

圖

考

恆山部彙考二

陶唐氏 帝堯一則

周 成王一則

秦 始皇一則



古今圖書集成方輿彙編山川典第四十一卷目錄之一

漢 武帝天漢一則 宣帝神爵一則

後漢 章帝元和一則

北魏 太宗泰常二則 世祖太延一則 高祖太和  
真君一則 高宗和平二則 高祖太和

隋 煬帝大業二則

唐 太宗貞觀一則 元宗開元三則 天寶三

宋 太祖乾德一則 太宗太平興國一則 真  
宗大中祥符二則 高宗紹興一則

金 世宗大定一則

元 世祖中統一則 至元二則

明 太祖洪武四則 成祖永樂一則 仁宗洪  
熙一則 宣宗宣德一則 英宗正統二則

代宗景泰四則 英宗天順一則 憲宗成  
化六則 孝宗弘治七則 武宗正德三則

世宗嘉靖七則 穆宗隆慶一則 神宗萬曆  
二則 熹宗天啓一則 愍帝崇禎一則

### 恆山部彙考三

皇清 順治三則



山川典第四十一卷

恆山部彙考一

北嶽恆山

自虞帝有十一月之巡狩而北嶽以名歷三代及漢唐相沿至今雖更名不一要皆兢兢致祭罔敢或缺其山在今山西大同府渾源州之南二十里直隸真定府曲陽縣之西北一百四十里高三千九百餘丈周迴約三千里峰巖洞峪爲勝景爲仙跡者甚衆嶽廟昔在曲陽今則移於渾源



北嶽恆山圖





考

按書經虞書舜典十有一月朔巡守至于北岳蔡傳北

岳恆山也十一月北以其時也

夏書禹貢太行恆山蔡傳恆山冀州山地志在常山郡

上曲陽縣西北今定州曲陽也

按禮記王制十有一月北巡守至于北岳如西巡守

之禮疏恆山為北岳郭註云在常山上曲陽縣西北

按周禮夏官職方氏正北曰并州其山鎮曰恆山註

恆山北岳也在上曲陽縣訂義易氏曰漢志恆山郡上

曲陽縣常山谷在西北按唐定州恆陽縣有北嶽今

改為中山府縣為曲陽即漢之舊也

按爾雅釋山河北恆註北嶽恆山疏河北恆註北嶽

恆山者下文恆山為北嶽是也鄭元云在上曲陽

恆山為北嶽註常山

按山海經北山經獄法之山又北二百里曰北嶽之

山多枳棘剛木有獸焉其狀如牛而四角人曰彘耳

其名曰諸懷其音如鳴鴈是食人諸懷之水出焉而

西流注于囂水其中多鮪魚魚身而犬首其音如嬰

兒食之已狂釋義北嶽當為恆山在雲中渾源

按春秋元命苞昂畢散為冀州分為趙國立為恆山  
宋均注曰恆山昂畢之精

按漢書地理志常山郡上曲陽註郡本作恆山避文

帝諱故改日常山恆山在上曲陽縣西北有祠并州  
山禹貢恆水所出東入滹莽日常山亭應劭曰滹音

彊

按後漢書郡國志中山國上曲陽故屬常山恆山在

西北註有泉水于吉得神書晉地道記自縣北行四

百二十五里恆多山坂名飛狐口

按白虎通巡狩北方為恆山恆者常也萬物伏藏於  
北方有常也尚書大傳曰五岳謂岱山霍山華山恆

山嵩山也

按風俗通義五嶽恆山恆者常也萬物伏藏於北方  
有常也廟在中山上曲陽縣

按晉書地理志常山郡上曲陽註恆山在縣西北有

坂號飛狐口

按魏書地理志中山郡上曲陽註有恆山



古今圖書集成  
按隋書地理志恆山郡滋陽註有大茂山

博陵郡恆陽註有恆山

按唐書天文志大梁析木以負北海其神主于恆山  
地理志定州曲陽註本恆陽元和十五年更名是年  
又更恆岳曰鎮岳有岳祠

按地理通釋十道山川攷常嶽在定州曲陽縣西北  
郡縣志在縣北一百四十里常水所出職方并州山  
鎮曰恆山是爲北嶽

歷代州域總叙唐十道河北道常嶽在焉

按太平御覽地部北嶽恆山常山圖經曰在縣西北  
百四十里尚書禹貢太行恆山至于碣石有恆水出  
焉其下有祠晏天王按山記曰高三千九百丈方三  
十里周迴三千里上有太元之泉神草十九種道者  
服之成仙又太史公云北嶽有五名一名蘭臺府二  
名列女宮三名華陽臺四名紫微宮五名太乙宮或  
云大茂山上至四百餘里號飛狐之口有率然蛇孫  
吳論兵勢管子曰其山北臨代南俯趙東接河海之  
間早生而晚殺五穀之所蕃熟四種五穫焉楊固北

古今圖書集成  
都賦曰茂丘茂山也蓋恆岳別名派水從西來甚大至茂山之西伏於地過山而復出其大如初世言避恆之靈

按三才圖會恆山圖考恆山五嶽之北嶽也在山西大同府渾源州周官并州其山鎮曰恆山風俗通曰恆常也萬物伏北方有常亦謂之常山高三千九百丈七尺上方三十里有太元之泉神草十九種服之可度世管子云其山北臨代南俯趙東接河海之間早生而晚殺五穀之所蕃熟四種五穫焉後魏書云

道武帝立廟于其上置侍祀九十人歲時祈禱水旱至文成帝東巡親禮其神焉

又云北嶽在渾源州之南爲舜北巡狩之所恣生于天縱盤于地其胷盪高雲其巔經赤日循坡東迤嶺北而上是多珍花靈草姿態不類桃芳李葩映帶左右山半俯窺高如緣虛歷空上七里是爲虎風口其間多橫松彊柏狀如飛龍怒虬葉皆四衍登眺三里始至嶽廟之上上有飛石窟兩崖壁立豁然中虛相傳飛于曲陽縣今尚有石突峙故歷代怯升登就祠



古今圖書集成  
于曲陽以爲亦嶽靈所寓也又數十步許爲聚仙臺  
臺上有石坪東則漁陽上谷西則大同以南奔峰來  
趨北盡渾源雲中之景南日五臺隱隱在三百里外  
而翠屏五峯晝錦封龍諸山皆俛首伏脊于其下  
按潛確類書區宇部恆山在渾源州卽北嶽也水經  
謂之元嶽山多奇花靈草映帶左右斧斤不敢入上  
有飛石窟兩崖壁立豁然中虛相傳飛至曲陽縣歷  
代怯升登者就祠于曲陽以爲嶽靈所寄也  
按圖書編山西山考恆山在山西大同府渾源州南

二十里卽北嶽也水經謂之元嶽其山高侵霄漢舜  
北巡狩至于恆山卽此山有天峰嶺大茂山安王石  
龍泉觀及通元谷步雲路望仙嶺碧峰障虎風口集  
仙洞白雲堂紫芝谷潛龍泉琴棋臺會仙府聚仙臺  
得一菴夕陽巖白虎峰古老嶺石脂圖白龍洞  
按山西通志山川恆山在大同府渾源州南二十里  
卽北嶽亦謂之元嶽其山高侵霄漢山之頂名天峰  
嶺下建北嶽觀觀側有飛石窟上建后土祠鎮之觀  
前風如虎吼名虎風口觀東南五十里有潛龍泉歲



古今圖書集成  
旱禱雨輒應又能愈疾上建龍泉觀觀之東有夕陽巖巖下有通谷巖東面有碧峰障東南有古老嶺嶺下有白虎峰觀之北峰頂百餘步有琴棋臺會仙府聚仙臺得一菴又東北有白雲堂初入山有道名步雲路行數里有翠雲亭上亭坡有望仙嶺東半崖有集仙洞東北有紫芝峪西南有石脂圖今釐正祀典始遣官祭北嶽於此

按雲中郡志山川恆山在渾源州南二十里初入山迤邐而上有步雲路翠雲亭其巔最高處名天峰嶺嶺之下建北嶽觀觀之側有飛石窟其前有虎風口東南五十里有潛龍泉禱雨輒應又能愈疾其東有夕陽巖通元谷碧峰嶂其東南有果老嶺白虎峰其北有琴棋臺會仙府聚仙臺得一菴而東北又有白雲堂望仙嶺東半壁有集仙洞東北有紫芝谷西南有石脂圖諸勝

柏山與恆山相連多柏故名

按渾源州志山川恆山在城南二十里卽北岳爲并州鎮山頂建岳廟有十八景詳見岳志

古今圖書集成  
按畿輔通志山川恆山在真定府曲陽縣西北一百四十里卽舊阜平之大茂山也自渾源州發脉由蜚狐嶺達曲陽寰宇記云舊傳一峰自渾源州恆山飛來故名又輿地要覽云山有太元之泉神草一十九種服之可以度世

按真定府志山川恆山在曲陽縣西北一百四十里天文志恆山辰星主焉爾雅曰恆山爲北嶽蓋祀典五岳之一輿地要覽其山有太元之泉神草十九種服之成仙唐貞觀間忽有飛石墜于縣西因建祠自

是皆於祠望而祭之

大茂山卽神仙山在阜平縣東北七十里山下昔有古祠

古蹟四土山在曲陽北嶽廟垣四隅高三丈基圓百步許當時樓臺今廢而基址存焉

飛來石在曲陽北嶽廟內世傳以爲大舜十有一月北巡狩至曲陽因阻雪柴望有大石飛墜帝側遂建祠焉細玩之有磨礮形想此石飛時粗厲後人磨礮以作美觀爾



古今圖書集成  
祀典北嶽廟在曲陽縣西附城距恆山百餘里舊在山西渾源州恆山之麓而嶽名不著括地志云北嶽有五別名一曰蘭臺府二曰列女宮三曰華陽臺四曰紫臺五曰太乙宮其立祠于此不知始于何代或曰唐貞觀間忽有飛石墜于縣西因建祠于是望而祭之初稱北嶽府君元宗開元中封安天王宋眞宗祥符四年復加安天元聖帝慶曆八年安撫使韓琦領定州事責員外郎游君開重修立碑元又加爲安天大貞元聖帝洪武三年特定爲北嶽恆山之神

按曲陽縣志方域志恆山在治西北一百四十里卽阜平之大茂山也自渾源州發脉由蜚狐嶺達曲陽寰宇記云舊傳一峰自渾源州恆山飛來遂名又輿地要覽云山有太元之泉神草一十九種服之可以度世

按恆岳志星紀恆山爲元岳下鎮元州上應元天當北方元武七宿辰星在位焉於方爲北於時爲冬於行爲水於卦爲坎於支爲子於干爲壬癸於德爲貞爲智於色爲黑於音爲羽於味爲鹹於數爲六於律



爲黃鍾於神爲黑帝顓頊之所治元冥之所宅

山紀恆山五岳之北岳也舜典曰至于北岳禹貢曰太行恆山周禮曰并州鎮山曰恆山尚書大傳謂之弘山漢諱文帝改常山唐元和中更名鎮岳宋諱真宗亦名常山凡經史稱常山皆漢宋人闌入者水經謂之元岳又名陰岳紫岳葛洪枕中書謂之太恆山亦稱恆宗命岳茂丘括地志曰北岳有五別名蘭臺府列女宮華陽臺紫臺太乙宮釋家謂之青峰埵道家謂之總元洞天金城福地又名太乙洞天應劭風

俗通曰恆常也萬物伏北方有常也白虎通曰北方陰終陽始其道常久故曰常山山脉發崑崙其東北一支自積石而北入塞外東爲陰山又南入雲中境從朔州西折而東爲寧武之天池代之鴈門勾注又東爲覆宿夏屋茹越書厓突起于渾源州之南爲恆山自恆山南出爲太行王屋西南盡于河東出爲紫荆居庸而東北盡于海五岳圖云恆山高三千九百丈七尺上方三十里周迴三千里福地記云恆山周迴一百三十里其疆域在唐爲冀州虞爲并州夏復

為冀州周復為并州春秋時為代國戰國時為趙國秦以後建置分合不一然凡因地冀并者皆恆之四履也今之大同府在恆北一百二十里渾源州隸焉自州南十里入磁硤又五里至岳廟山門又十里陟山巔巔高入天際松檜蔽空風聲若濤羣山羅列擁衛若衆星拱極其得名者曰大茂山一名神尖山嶺則有天風嶺一作天峰嶺望仙嶺果老嶺峰則有白虎峰嶂則有碧嶂巖則有夕陽巖洞則有總真洞一名金龍洞集山洞白龍洞還元洞石則有石脂圖窟

則有飛石窟口則有虎風口峪則有紫芝峪谷則有通元谷臺則有琴棋臺聚仙臺泉則有潛龍泉福地記云恆山有太元之泉湫則有龍湫井則有滌井前人標其勝槩為十八景惟大茂山天風嶺或以為支山或以為恆頂不可攷云恆距岱一千五百里距華二千一百里距衡五千八百里距嵩二千一百里距京師七百里距晉省六百餘里

廟紀恆山岳廟創自北魏太武帝太延元年于宣武景明元年乃災唐武德間復建唐末頽圯金復建天



古今圖書集成  
會大定間重修金末廟燬于兵亂元復建元末復燬  
明洪武中都指揮周立復建成化初都御史王世昌  
檄知州關宗重修弘治初知府閻鉦檄知州董錫重  
修二十四年奉敕擴修都御史劉宇行視以古廟陜  
隘度地中峰之陽建朝殿廡門規制始備改古廟爲  
寢宮古廟在山巔負艮抱坤所謂高入天際松檜蔽  
空者邃广若雷中空若窟深廣僅容殿三楹脊隱于  
窟簷縮于雷兩翼山削如壁去殿五丈許左翼自前  
折而右如障所不與右翼接者丈許如箭筈因建門

焉門內向上建小廡廡前一丈許卽爲殿臺臺陜至  
不能容陛不稱鈞天居然結構窈窕幾於化工寢宮  
奉岳神及配前小廡及門祀太尉神朝殿在中峰前  
去宮里許負坎抱離正殿七楹金鋪朱戶壯麗聳觀  
殿前爲臺臺高十餘丈臺南地陡下石陛百級乃至  
中阪東西爲兩廡廡脊不及陛之半外建門三楹額  
曰崇靈正殿奉岳神從祀部使者祈方郡守修常秩  
必駿奔于此其士女祝釐走望仍頂禮于寢宮焉但  
正殿束于山險後峻前蹴微乏平廠然衆山環拱憑

虛躡空孫統云櫺軒臨萬仞之壑土木被丹藻之華  
語若爲廟設矣亭則有烟霞亭潛龍亭九華亭碧雲  
亭翠雪亭凝翠亭望仙亭茶亭堂則有白雲堂庵則  
有得一庵茶庵樓則有天下名山樓山門去廟十里  
在磁峽東麓扁曰北岳恆山前建大坊扁曰北岳恆  
宗左坊曰屏藩燕晉右坊曰拱翊京畿坊前爲甬路  
石級百餘下建小坊扁曰百祀朝宗後曰千巖拱極  
前爲官道焉  
后土夫人祠在寢宮右飛石窟前

風伯雨師廟在寢宮左還元洞旁  
康太尉廟在寢宮山門右  
會仙府在朝殿後右  
龍王廟在朝殿前右  
玉皇廟在龍王廟右  
文昌廟在玉皇廟右  
救苦天尊廟在文昌廟右  
聖母廟在天尊廟右  
山神廟在聖母廟前



古今圖書集成  
藥王廟在山神廟左

三清殿在煙霞亭右

元帝廟在虎風口前

三元廟在山門內右

游紀步雲路在山門東北三里許爲游人首陟石徑盤紆入輕煙薄靄間故曰步雲路

望仙亭去步雲路二里在望仙嶺上高入翠微頰視下方迴絕塵境相傳有仙子至羽流於此佇望云

虎風口去望仙亭三里路益斗峻上接巉巖下臨絕

壑風聲怒號疑虎嘯其中萬山響應也

通元谷在夕陽巖下唐張果賜號通元先生隱于此故以名谷

白雲堂在會僊府東中有小洞深窅有致內奉元武小像

潛龍泉泉有二相距尺許一甘一苦澆沸潏灑不竭不溢取以禱雨頗驗飲浴能愈疾在煙霞亭東

夕陽巖在琴棋臺東剝削如障日入崦嵫羣山皆黝此巖猶明良久迺黯

古今圖書集成  
果老嶺亦以通元先生得名嶺綿亘峻險披蒙茸攀  
巉巖始得登在氣毬場驢蹄跡宛然石上一名古老  
嶺

白虎峰聳峙於會仙府東巋然蹲峙不可攀躋

琴棋臺在會仙府西北一峰突出不及峰杪五尋忽  
小阜如坪坪上石几鑿棋局磴道鱗鱗下臨無地偃  
僂捫歷而上几傍隙地僅布一席下視諸山如攢戟  
覆墩出沒皆際奇觀也銅棋子猶在

會仙府卽聚仙臺自琴棋臺下折而東稍北得平行  
地半畝許丹而紺者爲會仙府奉三清列仙兩翼居  
羽流繞以石垣

得一庵在虎風口上陡崖剝削庵居其前

翠雪亭亭下爲自在林萬松攢植如蒼龍如蚪如虺  
鱗鬣奮怒攫拏騰拳根際怪石嗟呀蹲踞如虎如鹿  
如獐自亭上眺視葱菁之色決眚而入亦奇觀也林  
名快活意猶岱之快活三正不必以雅語易之耳  
集仙洞會仙府之左山嵌空爲洞豁豁幽邃可以棲  
真



紫芝峪在得一庵西偏仙人採芝于此故名

碧峰障在琴棋臺東巖嶸崢嶸峻不容展

石脂圖在嶽廟西石阪作五色紋或如雲母如彈丸  
如珠光彩煥然相傳是仙人煉丹處其膩者云可作  
散

白龍洞在太尉祠上白雲縷縷自洞口出即為雨徵  
相傳有白龍蟠蟄其中

懸空寺在山門北二里岷峽西崖上崖壁立如削鐵  
空中竅石結構層樓仄磴危梯高入雲漢乃恆山第

一景也以在山門外故附之

物紀恆山去平原幾二十里地高寒不宜穀惟黍與  
菽可得中熟木則有松柏檜栝杆樺榆柳之屬花則  
有山丹石竹金蓮萱草之屬鳥則有雉雀鳩鳥鷹鷄  
之屬獸則有虎豹麀麇豺狼狐狸之屬藥則有黃精  
黃芪黃芩蒼朮紫蘇白芷薄荷荊芥桔梗枸杞甘草  
升麻麻黃茅香柴胡知母益母遠志防風羌活三稜  
百合百部車前子側柏葉酸棗仁王不留行之屬響  
樹連理枝樹王其最異者也

恆山部彙考二

陶唐氏

帝堯時舜居攝十有一月登北岳柴望

按書經虞書舜典十有一月朔巡守至于北岳如西

禮疏西岳禮畢即向恆山朔北也十有一月北巡守

至于北岳之下一如西岳之禮

按通鑑前編虞帝舜巡狩四岳八伯註虞夏傳曰維

元祀巡狩四岳八伯壇四奧沈四海封十有二山肇

十有二州樂正定樂名冬祀幽都弘山貢兩伯之樂



古今圖書集成  
焉冬伯之樂舞齊落歌曰縵縵

按史記封禪書十有一月巡狩至北岳北岳恆山也  
皆如岱宗之禮

周

成王定巡狩祭方岳禮至北方則祭北岳

按書經周書周官六年五服一朝又六年王乃時巡  
考制度于四岳諸侯各朝于方岳疏正義曰周制十  
二年一巡守如舜典所云春東夏南秋西冬北以四  
時巡行考正制度於四岳之下如虞帝巡守然

按周禮春官大宗伯之職以血祭祭社稷五祀五嶽

註五嶽北曰恆山

按恆岳志成王定制十二年一巡狩登方岳康王昭  
王穆王皆遵行無改

秦

始皇二十八年定名山川祀典恆山與焉

按史記始皇本紀二十八年始皇上鄒嶧山議封禪  
望祭山川之事 按封禪書秦并天下令祠官所常  
奉名山十二自殺以東名山曰恆山其牲用牛犢一

古今圖書集成  
方輿彙編山川典第四十一卷恆山部彙考二之三  
牢具珪幣

漢

武帝天漢三年春三月祀恆山

按史記武帝本紀帝在泰山親禪焉其後五年復至泰山修封還過祭常山

按漢書武帝本紀天漢三年春三月行幸泰山修封祀明堂因受計還幸北地祠常山瘞元玉

宣帝神爵元年使使者持節祀北岳于上曲陽

按漢書宣帝本紀不載 按郊祀志宣帝十三年改

元神爵令祠官以禮爲歲事自是五岳皆有常禮北岳恆山于上曲陽使者持節往祠一禱而三祠

後漢

章帝元和三年春二月遣使者祀恆山

按後漢書章帝本紀元和三年春二月戊辰進幸中山遣使者祠北嶽

按恆岳志時帝北巡至中山遣使以太牢祀北岳于上曲陽見黃白氣有神魚躍出十數

北魏



古今圖書集成  
太宗泰常四年秋八月遣使祀恆山

按魏書太宗本紀不載 按北史魏明元帝本紀泰常三年秋八月辛未東巡遣使祠恆山

泰常八年正月祀恆岳

按魏書太宗本紀不載 按禮志泰常八年正月南

巡恆岳祀以太牢

世祖太延元年立廟於恆岳春秋遣官致祭十二月祀北岳

按魏書世祖本紀太延元年十有二月癸卯遣使者

以太牢祀北岳 按禮志太延元年立廟於恆岳置

侍祀九十人歲時祈禱水旱其春秋泮涸遣官卒刺

史祭以牲牢有玉幣

太平真君十一年冬十一月祀恆山

按魏書世祖本紀不載 按禮志太平真君十一年

十一月世祖南征過恆山祀以太牢

高宗和平元年春正月如中山過恆岳致祭

按魏書高宗本紀不載 按恆岳志云云

和平二年如中山遣使者用蒼璧牲牢禮恆岳

古今圖書集成  
按魏書高宗本紀不載 按恆岳志云云

高祖太和十八年親爲文遣使祭恆岳薦牲玉

按魏書高祖本紀不載 按恆岳志云云

隋

煬帝大業三年有事于恆岳

按隋書煬帝本紀不載 按恆岳志云云

大業四年八月辛酉親祀恆岳

按隋書煬帝本紀云云

按恆岳志大業四年秋八月巡河北親祀恆岳西域

吐谷渾十餘國咸來助祭

唐

太宗貞觀十九年親爲文祭北岳

按唐書太宗本紀不載 按恆岳志貞觀十九年親

爲文以太牢祭北岳于上曲陽一說唐貞觀間有石

飛墮于曲陽因建祠自是祭岳于祠

元宗開元元年封北岳爲安天王

按唐書元宗本紀不載 按恆岳志開元元年封北

岳爲安天王唐六典立冬日祭北岳于定州北鎮封



古今圖書集成  
始此張嘉貞撰文碣在曲陽按安王石之名蓋因安天王封號附會其說爾

開元十四年定制祭北岳恆山于定州

按唐書元宗本紀不載 按禮樂志五岳四瀆歲一

祭各以五郊迎氣日祭之北岳恆山祭於定州

開元二十五年十月戊申命太子賓客王丘祭北岳

按唐書元宗本紀不載 按冊府元龜云云

天寶元年十二月乙亥詔太常卿韋縉祭北岳

按唐書元宗本紀不載 按冊府元龜云云

天寶五載封北岳爲王

按唐書元宗本紀不載 按舊唐書元宗本紀天寶

五載春正月封中岳爲中天王南岳爲司天王北岳

爲安天王

天寶八載九月命太子詹事李旭祭北岳

按唐書元宗本紀不載 按冊府元龜云云

宋

太祖乾德六年定祭北鎮於定州北岳祠

按宋史太祖本紀不載 按圖書編宋初緣舊制祭

古今圖書集成  
北岳恆山於定州至乾德六年有司請祭北鎮從之  
此後望祭北鎮於定州北岳祠

太宗太平興國八年定以立冬日祀北岳恆山北鎮  
醫巫閭山竝於定州北鎮就北岳廟望祭

按宋史太宗本紀不載 按禮志云云

真宗大中祥符四年加北岳帝號

按宋史真宗本紀大中祥符四年五月乙未加上五  
岳帝號

按恆岳志大中祥符四年冬十月加封北岳安天元

聖帝后加號靖明后帝惑于天書加上五岳帝后號  
御朝元殿發冊命以工部侍郎馮起攝太尉太僕少  
卿裴莊攝司徒奉玉冊冕服於曲陽祠

大中祥符八年三月製北岳醮壇文刊石於廟

按宋史真宗本紀不載 按玉海云云

高宗紹興七年詔以立冬日祭北岳

按宋史高宗本紀紹興七年五月壬申命禮官舉岳  
鎮海瀆之祀

按恆岳志紹興七年詔以立冬日祭北岳太常博士



古今圖書集成  
黃積厚言岳鎮海瀆請以每歲四立日祭東西南北  
中五岳如祭五方帝禮詔從之時岱華嵩恆皆陷于  
金蓋望祀云

金

世宗大定四年詔以立冬日祭北岳

按金史世宗本紀大定四年六月庚午初定祭五岳  
四瀆禮 按禮志四年禮官言岳鎮海瀆當以五郊  
迎氣日祭詔依典禮以立冬日祀北岳恆山於定州

元

世祖中統二年以北岳爲西道

按元史世祖本紀不載 按祭祀志自中統二年始  
凡十有九處分五道後乃以北岳爲西道

至元三年夏四月定以十月祀恆山

按元史世祖本紀至元三年秋七月丙午遣使祀五  
岳 按祭祀志三年夏四月定歲祀岳鎮海瀆之制  
十月土王日祀恆山於曲陽縣界

至元二十八年二月加北岳封號

按元史世祖本紀至元二十八年春二月丁酉詔加

岳瀆四海封號各遣官詣祠致祭 按祭祀志至元

二十八年春二月加上北岳安天大貞元聖帝 按恆岳志

云至元五年加號北岳安天大貞元聖帝今據本紀及祭祀志俱云在二十八年自當以此為是

明

太祖洪武二年春正月遣使祀北岳

按明會典洪武二年令有司時祀祀典神祇

按恆岳志洪武二年春正月遣內藏庫副使魏士舉

代祀北岳于上曲陽

洪武三年夏六月詔更北岳封號稱北岳恆山之神

秋七月遣祠祭署令王俊齋祀文祭北岳于上曲陽

按恆岳志云云

洪武七年定祭北岳恆山於直隸真定府又令春秋

仲月上旬擇日祭

按明會典云云

洪武二十六年定祭北岳祝文稱北岳恆山之神

按明會典云云

成祖永樂七年春三月車駕駐蹕景州望祭恆山

按恆岳志云云



古今圖書集成  
仁宗洪熙元年遣順天府尹甄儀告祀北岳于上曲陽

按恆岳志云云

宣宗宣德元年遣興安伯徐亨告祀北岳于廟

按恆岳志云云

英宗正統元年春正月遣都察院右僉都御史魯穆相告祀北岳于廟

按恆岳志云云

正統九年夏四月大旱遣翰林院編修倪謙齋祀文

禱雨北岳

按恆岳志云云

代宗景泰元年春正月遣翰林院修撰周旋告祀北岳

按恆岳志云云

泰景四年春秋兩祀北岳

按恆岳志景泰四年春二月恆陰積雪遣太常寺寺丞丘晟祈祀北岳秋七月大水遣翰林院修撰曹恩祈祀北岳

古今圖書集成  
景泰五年夏四月大旱遣翰林院典籍吳恆禱祀北岳

按恆岳志云云

景泰六年夏六月大旱遣中書舍人劉福禱祀恆岳  
按恆岳志云云

英宗天順元年春二月遣中書舍人王成告祀北岳于廟

按恆岳志云云

憲宗成化元年春三月遣禮科右給事中王詔告祀

北岳于廟

成化四年夏四月大旱遣眞定府知府邢簡禱祀北岳

成化七年春正月大雪遣禮部左侍郎邢讓祈祀北岳

成化十三年夏四月雨雪遣眞定府知府田濟祈祀北岳

成化二十年冬十二月不雪遣眞定府知府余瓚祈祀北岳



古今圖書集成  
成化二十三年夏五月大旱遣吏部左侍郎劉宣禱  
祀北岳

按以上俱恆岳志云云

孝宗弘治元年春正月遣禮科右給事中張九功告  
祀北岳于廟

弘治四年春三月大旱遣吏部左侍郎彭韶禱祀北  
岳

弘治六年夏四月大旱遣巡撫都御史張琳禱祀北  
岳

弘治十年夏四月大旱遣巡撫都御史高銓禱祀北  
岳

按以上俱恆岳志云云

弘治十四年春三月遣官祀恆岳

按恆岳志弘治十四年宣大延綏馬災春三月遣宣  
大巡撫都御史劉宇禱祀北岳于恆山災止

弘治十五年詔修恆山岳廟

按恆岳志弘治十五年詔建廟于恆山兵部尚書馬  
文昇疏請釐正祀典改北岳祭于恆山下禮官覆奏

古今圖書集成  
曲陽廟祀已久當仍舊山在渾源者修治其廟詔從之

弘治十七年夏五月大旱遣都察院右副都御史王沂禱祀北岳于上曲陽

按恆岳志云云

武宗正德元年春三月遣通政司右參議熊偉告祀北岳于廟

按恆岳志云云

正德六年秋八月寧夏逆黨平遣真定府通判孫邦

直謝祀北岳

按恆岳志云云

正德七年冬十一月流寇復起遣真定府知府李璞祈祀北岳

按恆岳志云云

世宗嘉靖元年夏四月遣鴻臚寺左寺丞翟宗仁告祀北岳于廟

按恆岳志云云

嘉靖 年科臣陳棐請正嶽祀



古今圖書集成  
按續文獻通考嘉靖初科臣陳棐請正嶽祀略曰真定府曲陽縣有北嶽恆山廟爲朝廷秩祀之所及查其實恆山在迤北渾源州南北相去甚遠俗傳曾有飛石一方自恆山坎中飛來墜于曲陽故立廟祀今其廟扁有飛石殿臣竊疑之臣考舜典十有一月巡狩至于北嶽周禮載恆山爲并州之鎮水經爲北嶽爲元嶽天文志大梁析木以負北海其神主恆山三代而下歷唐隋俱於此致祭石晉失燕雲十六州之地宋未能混一北爲契丹所據無緣至幽薊之域而

覩所謂北岳者所以止得祭之於曲陽詭言飛石之謬以粉飾其削弱之跡耳然宋都汴而真定在汴京之北以爲北門不得已權宜祭之猶之可也我太祖高皇帝恢復中夏奄有萬方首定岳鎮海瀆之祀但時都金陵真定迴在京師之北所以因循未曾釐正我成祖文皇帝建都北平而真定已在京師之南使當時有禮官建明顧有南面而登踵宋人削弱之迹哉臣因此而論及五岳焉臣觀祀典載嵩山中岳在河南登封縣泰山東岳在山東泰安州衡山南岳在

古今圖書集成  
湖廣衡山縣華山西岳在陝西華陰縣祠祀皆近在  
本山之麓而恆山北岳則卽大同府東南渾源州是  
也今不惟北岳之祀缺謬而東岳行祠遍天下尤爲  
惑妄乞將渾源州北岳恆山定爲秩祀之所其廟制  
加修拓以後凡遣告祈請皆詣此致登其曲陽祠廟  
但令有司致祭飛石殿扁并令改撤於凡東岳行祠  
除京師及齊魯之境外其餘量改書院社學仍不許  
加修創建以昭皇上釐正祀典之盛則治道幸甚  
嘉靖九年夏五月遣使祀北岳

按恆岳志嘉靖九年夏五月大旱蝗爲災遣都察院  
右副都御史錢如京祈祀北岳

嘉靖十一年夏六月大澇遣眞定府知府胡效才祈  
祀北岳

按恆岳志云云

嘉靖十八年春二月帝南巡祭恆山

按明會典嘉靖十八年南巡過眞定望祭北岳恆山  
之神用牛犢羊豕上具常服行禮如常儀五府九卿  
巡撫大臣吉服陪拜命翰林院撰祭文



古今圖書集成  
嘉靖三十三年大旱遣巡撫都御史艾希淳祈祀北岳

嘉靖四十年蝗爲災遣巡撫都御史毛愷祈祀北岳  
穆宗隆慶元年秋八月遣通政司右叅議夏範告祀北岳于廟

神宗萬曆元年春三月遣吏科給事中李日強告祀北岳于廟

萬曆十五年秋八月朔雨雹傷禾稼遣巡撫都御史賈三近祈祀北岳

熹宗天啓元年夏四月遣太僕寺少卿杜士全告祀北岳于廟

愍帝崇禎元年夏四月遣禮部儀制司主事張定志告祀北岳于廟

按以上俱恆岳志云云

恆山部彙考三

皇清

順治八年

按恆岳志順治八年遣鑾儀衛都督同知喬可  
用告祀北岳于上曲陽

順治十七年

按恆岳志順治十七年奉

旨改北岳祭于恆山

順治十八年



按恆岳志順治十八年遣工部右侍郎李呈祥  
祭恆岳

